

ИНСОН ВА ҚОНУН

ЎЗБЕКИСТОН РЕСПУБЛИКАСИ
АДЛИЯ ВАЗИРЛИГИНИНГ ХУҚУҚИЙ ГАЗЕТАСИ

"Мен амалдан ҳайат
зақимати"

Агар халқда буюк
ислохотга эҳтиёж ҳа-
қиқатан ҳам пайдо
бўлган бўлса, Худо ҳам
унинг томонида бўла-
ди ва муваффақият
унга ёр бўлади.

ГЁТЕ

2019 йил 18 июнь

сешанба № 24 (1176)

e-mail: insonvaqonun@adliya.uz

www.insonvaqonun.uz

t.me/ivquz

fb.com/ivquz/

ФЕЙК-НЬЮС ВА ХАВФСИЗЛИК:



ҚОНУНЛАР ЎЛФОНГА ҚАРШИ

РЕПУБЛИКА ИШЧИ ГУРУҲИ СИРДАРЁДА

ПРЕЗИДЕНТИМИЗНИНГ 2019 йил 14 майда "Тадбиркорлик фаолиятини қўллаб-қувватлаш ва ҳимоя қилиш ти-зимини тубдан такомиллаштириш чо-ра-тадбирлари тўғрисида"ги Фармони имзоланди.

Тадбиркорларнинг шу жумладан, чет эллик инвесторларнинг мурожаат-лари билан ишлашни ташкил этиш сифати ва тезкорлигини ошириш, улар билан очиқ ва тўғридан-тўғри му-лоқотни таъминлаш, уларнинг қону-ний талабларини рўйбга чиқариш ва муаммоли масалаларни ҳал этиш, ҳу-дудларнинг ижтимоий-иқтисодий ри-вожланишига реал ҳиссани кўпайти-риш, аҳолининг иш билан бандлигини ошириш ва унинг моддий фаровонли-гини ўстириш мазкур Фармоннинг асо-сий мақсади ҳисобланади.

Шунингдек, Фармон билан Бош ва-зирнинг Тадбиркорлар мурожаатлари-ни кўриб чиқиш қабулхоналари ҳамда Тадбиркорлар мурожаатларини кўриб чиқиш қабулхоналари фаолиятини ташкил этиш ва мувофиқлаштириш котибати ташкил этилиб, улар фао-лиятининг асосий йўналишлари бел-гилаб берилди.

Шундан келиб чиқиб, ишчи гуруҳи томонидан ўн минг нафардан ортиқ тадбиркорлик субъектлари билан уч-рашувлар ўтказиш режалаштирилган.

Адлия вазири Русланбек Давлетов раҳбарлигида ташкил этилган Респу-блика ишчи гуруҳи томонидан жорий йилнинг 13 ва 14 июнь кунлари Сир-дарё вилоятининг Гулистон шаҳри, Ховос, Оқолтин ҳамда Сирдарё ту-манларида учрашувлар бўлиб ўтди.

Унда 500 нафардан ортиқ тадбир-корлик субъектлари ва чет эл инвес-торлари иштирок этди. Улардан 100 дан зиёд мурожаатлар келиб тушди.

Мазкур мурожаатларда тадбиркор-лик фаолиятини ривожлантиришга ер участкаси ва кредит ажратиш, муҳан-дислик-коммуникация тармоқларига уланиш, бузилган иморатларга нисба-тан компенсация тўловларини ўнди-риш ҳамда божхона ва солиқ тўловла-ри билан боғлиқ масалалар кўтарил-ди.

Мурожаатларни кўриб чиқиш даво-мида вазирликлар, идоралар, ҳўжа-лик бошқаруви органлари ва тижорат банкларининг фаолиятига бевосита тааллуқли бўлган айрим муаммолар жойида ҳал этилди.

— Гулистон шаҳар ҳудудидаги ик-кита дўконим бузилган, лекин улар учун компенсация тўлови амалга оширилмаётган эди, — дейди тадбир-кор Г.Ўлмасова. — Учрашууда ушбу муаммо юзасидан мурожаатим қано-атлантирилди, тегишли ташкилотлар-га ўн кун муддат ичида тўловни амал-га оширишга топшириқ берилди.

Жойида ҳал этиш имконияти бўл-маган муаммо ва камчиликларни ту-ман (шаҳар) ва вилоят даражасида ҳал қилиш юзасидан қисқа ва ўрта муддатли тадбирлар режалари шакл-лантирилиб, мутасадди вазирлик ва идораларга тегишли топшириқлар бе-рилди.

Шўҳрат СУЯРОВ,
"Инсон ва қонун" муҳбири

САҲИФАЛАРДА:

Абитуриентлар
ДХМлар орқали
ҳужжат топширади

Бу йил тартиб қандай
бўлади?

Суд қарорини
ёзаётган судья

нима учун Конституция
моддаларини
қўлламаслиги керак?!

"Паспорти 2 ой
ўзимда

1 ой давлат идораларида
турар эди"

Абитуриентлар ДХМлар орқали хужжат топширади

БУ ЙИЛ ТАРТИБ
КАНДАЙ БЎЛАДИ?



Мақсуд ҚУРБОНОВ,
Давлат хизматлари Агентлиги
Самарқанд вилоят
бошқармаси бошлиғи:

— Бу йил куйидаги 5 та Олий таълим муассасаси учун хужжатларни барча шаҳар ва туманлардаги давлат хизматлари марказлари орқали топшириш мумкин:

- Тошкент давлат юридик университети;
- Қорақалпоқ давлат университети;
- Гулистон давлат университети;
- Фаргона давлат университети;
- Самарқанд давлат университети.

Шу билан бирга, хужжатларни университетларга топшириш жараёни соддалаштирилди ва бюрократик тўсиқлар бартараф этилди. Масалан, эндиликда куйидаги хужжатларни тақдим этиш талаби бекор қилинди:

- 1) 086У-шаклда тиббий маълумотнома;
- 2) Паспорт нусхаси;

3) 3х4 (6 дон) фотосурат;

4) Канцелярия моллари (папка, конверт, оқ қоғоз ва ҳ.к.);

5) Олий таълим муассаси жойлашган ҳудудга бориб хужжат топшириш учун қимматли вақт ва маблағ сарфлаш.

Энди абитуриент Давлат хизматлари марказига экстерриториал тамойили асосида, бир вақтнинг ўзига учта университетга хужжатларни топшириш учун ариза билан мурожаат қилиш ҳуқуқига эга ва Давлат хизматлари маркази ходимларига куйидаги хужжатларнинг асл нусхаларини тақдим қилиш кифоя бўлади:

1) Ички ишлар бўлимлари томонидан берилган фуқаролик паспорти ёки туғилганлик ҳақидаги гувоҳнома (16 ёшгача бўлган шахслар учун);

2) Умумий ўрта таълим (11-синф негизда) ёки ўрта махсус, касб-ҳунар таълими муассасини тугатганлиги ҳақидаги хужжат (иловаси билан);

3) Ўзбекистон Республикаси Президентининг ҳамда Вазирлар Маҳкамасининг норматив-ҳуқуқий хужжатларида белгиланадиган тартибда имтиёзга эга бўлган абитуриентлар учун имтиёз ҳуқуқини тасдиқловчи хужжат.

Зарур маълумотларни расмийлаштириб, киритилгандан сўнг Давлат хизматлари маркази ходими абитуриентга асл хужжатларни қайтаради ва QR-код (матрицали штрих код) қўйилган сўровномани икки нусхада чоп этиб, абитури-

ВАЗИРЛАР Маҳкамасининг 2019 йил 7 июндаги “Олий таълим муассасаларига ўқишга кириш учун хужжатларни қабул қилиш бўйича давлат хизматларини кўрсатишнинг маъмурий регламентини тасдиқлаш тўғрисида”ги қарорига биноан айрим олий ўқув юртлирига ўқишга кириш учун абитуриентлардан хужжатларни қабул қилиш ва жўнатиш вазифаси Адлия вазирлиги ҳузуридаги Давлат хизматлари Агентлигига юклатилди. Бироқ айни шу масала юзасидан абитуриентлардан тахририятимизга кўплаб саволлар келиб тушмаяпти.

Қайси Олий таълим муассасаларига жойлардаги давлат хизматлари марказлари орқали хужжат топшириш мумкинлиги ва бунинг афзалликлари ҳақида Давлат хизматлари Агентлиги вакили фикр билдирди:

ентга беради. Абитуриент маълумотларнинг тўғрилигини текшириб, сўровномани ўз имзоси билан тасдиқлайди, бир нусхасини ўзида олиб қолади ва иккинчи нусхасини Марказ ходимига беради.

Бироқ давлат хизматлари кўрсатилгани учун жорий йил битирувчиларидан ҳамда ногиронлиги бўлган ёки тўлиқ давлат таъминотидаги шахслардан давлат хизматлари кўрсатилгани учун тўлов ундирилмайди, барча бошқа абитуриентлардан энг кам иш ҳақининг 50 фоизи миқдорда (101 365 сўм) тўлов ундирилади, шунингдек, давлат хизматини олиш учун ЯИДХП, яъни интернет орқали Ягона порталдан мурожаат этилганда, абитуриентлар 10 фоизлик чегирмани кўлга киритади.

Абитуриентларнинг хужжат топширишига оид бу каби аниқликлар жорий этилишидан олдин чекка ҳудудларда истикомат қилувчилар учун бир қанча муаммолар ҳолатлар бор эди. Масалан, Самарқанд вилоятининг Қўшрабод туманида яшовчи абитуриент Тошкент давлат юридик университети ёки мамлакатнинг бошқа олий ўқув юртлирига кириш мақсадида хужжатларни топшириш учун бир неча мураккаб ва харажат талаб қиладиган босқичлардан ўттиши керак эди. Узоқ йўлни босиб, деярли 1000 километр (икки томон), фақат манзилга етиб бориш учун (бир томон) оптика бекатда алмашишга мажбур бўлган.

ХУЖЖАТЛАРНИ ЭНГ ҚУЛАЙ, ХАВФСИЗ ВА ТЕЖАМКОР ТАРЗДА ТАҚДИМ ЭТИШ



Оддий харажатларни
ҳисоблаганда:

Уйидан Қўшрабод тумани марказигача	10 000-15 000 сўм
Қўшрабод тумани марказидан “Самарқанд” автостанциясигача	15 000-20 000 сўм
“Самарқанд” автостанциясидан Самарқанд-Тошкент «Улуғбек» бекатигача	5 000-10 000 сўм
Самарқанд-Тошкент “Улуғбек” бекатидан “Тошкент” автостанциясигача	50 000-70 000 сўм
“Тошкент” автостанциясидан белгиланган манзилгача	10 000 сўм
Белгиланган манзилдан меҳмонхонагача	10 000-15 000 сўм

ЖАМИ 100 000-150 000 сўм

БУНДАН ТАШҚАРИ

ТУШЛИК УЧУН 20 000- 30 000 сўм	КЕЧКИ ОВҚАТ УЧУН 20 000- 30 000 сўм	КАНЦЕЛЯРИЯ МОЛЛАРИ ВА ФОТОСУРАТЛАР УЧУН 35 000-50 000 сўм	МЕҲМОҲОНАНИНГ ЭНГ ОДДИЙ ХОНАСИ УЧУН 100 000-150 000 сўм
--------------------------------------	---	--	--

Умуман олганда, абитуриент 2 кун ва 800 000-1 000 000 сўмгача бўлган маблағни сарфлаб, 1000 километр узоқликдаги масофани босиб ўтар эди.

Бошқарма бошлиғи шу кунларда ижтимоий тармоқларда Вазирлар Маҳкамасининг 468-сонли қарори асосида тасдиқланган маъмурий регламентда давлат хизматлари кўрсатилганлиги учун алоҳида тўлов ундириш белгиланганлиги ҳақида тарқалган хабарларга шундай муносабат билдирди:

— Барча оммавий ахборот воситалари орқали тарғиб қилинишини хоҳлардикки, давлат хизматлари марказлари орқали белгиланган олий таълим муассасаларига хужжат топширганлик учун, шунингдек, давлат хизматлари кўрсатилганлик учун тўлов ундирилмайди! Яна алоҳида таъкидлайман, айнаб абитуриентлар хужжатини топшириш бўйича давлат хизматлари кўрсатилганлик учун ҳеч қандай тўлов тўланмайди. Регламентдаги баъзи бир тушунмовчиликлар алоҳида ўрганиб чиқилса керак. Ушбу муҳим ўзгаришларнинг барчаси абитуриентлар ва уларнинг ота-оналарига, мамлакатимизнинг турли университетларига ўқишга кириш учун хужжатларни энг қулай, хавфсиз ва тежамкор тарзда тақдим этиш мақсадигагина қаратилган.

“Инсон ва қонун” мухбири
Мадҳия АБАЗОВА суҳбатлашди.

ДАВЛАТ ХИЗМАТЛАРИ МАРКАЗЛАРИ СИЗНИНГ ХИЗМАТИНГИЗДА

ДАВЛАТ хизматлари Агентлиги ва унинг жойлардаги бўлимлари юртимиз аҳлига даставвал 30 дан ортиқ турдаги давлат хизматларини кўрсатиш билан ўз фаолиятини бошлаган бўлса, ҳозирга келиб унинг сони 141 тага етди.

Бугун кўрсатилаётган давлат хизматлари халқимиз эҳтиёжининг деярли барча жиҳатлари, қирраларини қамраб олади.

Давлатимиз раҳбарининг “Фуқароларни ижтимоий қўллаб-қувватлаш бўйича қўшимча чора-тадбирлар ҳамда ўзбошимчилик билан қурилган турар жойларга нисбатан мулк ҳуқуқини эътироф этиш бўйича бир марталик умумдавлат акциясини ўтказиш тўғрисида”ги Фармони ва унинг ижросини таъминлаш юзасидан қабул қилинган Вазирлар Маҳкамасининг қарори низоҳатда долзарб ва бир неча йиллардан буён ечимини қутаётган муҳим ижтимоий масаланинг оқилона ечимига хизмат қилди.

Рухсат олинмаган тарзда ўзбошимчилик билан қурилган иморатларга оид мулк ҳуқуқни бир марталик “амнистия” йўли билан эътироф этиш ҳамда фуқароларга тегишли бўлган тураржойларни давлат рўйхатидан ўтказишда амалий ёрдам кўрсатиш, шу аснода уй-жойга доир

ҳуқуқларни амалга ошириш учун қулай шарт-шароитлар яратиш ишлари муваффақиятли ҳал этилди.

Фуқароларнинг ушбу чигал масала юзасидан мурожаатларини қонуний ҳал этиш давлат раҳбари Фармони ва қарорининг мазмун-моҳиятини ташкил этди. Одамлар унинг тимсолида халқ давлат органларига эмас, балки давлатнинг ўзи халқ хизматига отланганини яққол ҳис этишди, фуқаролар дилида эртанги кунга нисбатан ишонч туйғулари жўш урди. Янада муҳими, масаланинг ҳуқуқий ва амалий ечимини таъминлашга масъул ва мутасадди идора-ташкилотлар фаолияти кескин кучайди.

Вилоятимиз шаҳар ва туманларидаги мавжуд 502 та маҳалла ҳудудларида ўтказилган дастлабки ўрганишларнинг ўзидаёқ ўзбошимчилик билан қурилган ва мулк ҳуқуқни эътироф этилиши зарур бўлган 23 минг 300 дан зиёд тураржой қурилмалари аниқланди. Кейинги кузатув ва мониторинг тадбирлари эса “амнистия” акти татбиқ этилиши мумкин бўлган объ-

ектлар сони бундан ҳам кўп эканлигини кўрсатди. Бу бир марталик “амнистия”ни татбиқ этиш юзасидан Давлат хизматлари Агентлигининг виллоятимиз туман (шаҳар) бўғинларига келиб тушган 45 мингдан кўпроқ мурожаат мисолида намоён бўлди ва ушбу йўналишдаги тушунтириш, тарғиб-бот-ташвиқот тадбирлари ижобий натижа бергани, қабул қилинган Фармон ва қарорнинг мазмун-моҳияти аксарият фуқаролар томонидан тўла ва чуқур идрок этилганидан далолат берди.

Мазкур масалада Марказларга шу йилнинг 1 апрелигача келиб тушган аризаларнинг 15 мингдан ортиғи қаноатлантирилди. Айни пайтда ўзбошимчилик билан қурилган 6 мингдан зиёд иморатларга мулк ҳуқуқини эътироф этиш учун қонуний ва меъёрий асослар мавжуд эмаслиги ҳам маълум бўлди. 20 мингдан кўпроқ аризани қонун талаблари асосида ҳал этиш учун тезкор чора-тадбирлар қўрилди.

Шу ўринда мурожаатларни қонун талаблари асосида қўриб чиқиш учун бир

қатор мутасадди ташкилотларга масъуллик етишмагани, пайсалкашлик ва пала-партишлик ҳоллари иш сифати ва самарадорлигига бир мунча салбий таъсир ўтказиб келганини ҳам қайд этиш зарур. Уни ўз вақтида аниқлаш ва бартараф этишга қаратилган тизимли амалий ва ҳуқуқий таъсир чоралари ўз натижасини берди. Аксарият нуқсонлар қонунбузилиш ҳоллари рўй бермаёқ бартараф қилинди, жиддий саналган бир қатор камчиликларга эса ҳуқуқий таъсир чоралари орқали чек қўйилди. Хусусан, кўчмас мулкка нисбатан ҳуқуқни эътироф этишни ташкил этиш бўйича туман (шаҳар) комиссиялари фаолиятининг қонунийлигини таъминлаш, улар томонидан мурожаатларнинг белгиланган тартибда қўриб чиқишнинг аниқлаш мақсадида жорий йилнинг биринчи чорагида 2 маротаба 27 та ташкилотда ўрганиш тадбирлари ўтказилди. Унинг натижаларига кўра, 20 минг 395 та қонунбузилиш ҳолати аниқланди. Мазкур нуқсонлар юзасидан комиссияларнинг тегишли аъзоларига нисбатан қонуний таъсир чоралари қўрилди. Бу жараёнда 39 та маъмурий баённома расмийлаштирилиб, мутасадди ташкилот раҳбарлари номига 7 та тақдимнома юборилди.

Улуғбек АБДУЛЛАЕВ,
Давлат хизматлари Агентлиги
Хоразм вилоят бошқармаси бошлиғи

ИХТИСОСЛАШТИРИЛГАН ФИЛИАЛГА ҚАБУЛ БОШЛАНДИ



Шавкат ҲАМРОҚУЛОВ,
Тошкент давлат юридик университети
Ихтисослаштирилган филиал
Тайёрлаш курслари декани:

— Тошкент шаҳри ва Тошкент вилоятида ҳуқуқбузарликлар профилактикаси ва жамоат хавфсизлигини таъминлаш соҳасида юридик кадрлар тайёрлаш ва қайта тайёрлаш самарадорлигини янада ошириш мақсадида Президентимизнинг 2019 йил 7 февралдаги Қарори қабул қилиниб, Тошкент давлат юридик университетининг Ихтисослаштирилган филиали ташкил этилди.

Филиалда кундузги таълим шаклида бакалавриятнинг махсус уч йиллик дастури бўйича юридик кадрларни тайёрлаш ҳамда олий нуридик маълумотга эга бўлган кадрларни махсус олти ойлик дастур бўйича қайта тайёрлаш кўзда тутилган.

Бакалаврият таълим йўналишига умумий ўрта (11-синф негизда) ёки ўрта-махсус маълумотга эга, соғлигининг ҳолати бўйича ички ишлар органи ходими ёки Миллий гвардия ҳарбий хизматчисининг хизмат мажбуриятларини бажаришга қодир бўлган, Тошкент шаҳри ёки Тошкент вилоятида доимий пропискага эга Ўзбекистон Республикаси фуқароларидан ўқишга кириш учун ҳужжатлар қабул қилинади.

Шунингдек, Ўзбекистон Республикаси Ички ишлар вазирлиги ва Миллий гвардияси қўмондони таъсислари асосида олий нуридик маълумотга эга бўлган амалдаги ходимлар ва ҳарбий хизматчилардан белгиланган тартибда эгаллаб турган лавозими ва пул таъминоти сақлаб қолинган ҳолда қайта тайёрлаш курсига ўқишга кириш учун ҳужжатлар қабул қилинади.

Шу ўринда қайд этиш лозимки, Президент Қарори билан Адлия вазирлигига манфаатдор вазирлик ва идоралар билан биргаликда 2019 йил 1 сентябрга қадар ҳудудларнинг юридик кадрларга бўлган

эҳтиёжларини ҳисобга олган ҳолда Тошкент давлат юридик университетининг ҳудудий филиалларини ташкил этиш вазифаси топширилган эди.

Филиал бакалавриятига қабул квотаси йилга 255 кишини, кадрларни қайта тайёрлаш дастури бўйича эса ҳар олти ойда 50 кишини ташкил этади.

Бакалавриятга ўқишга кириш учун ҳужжат топширадиган талабгорнинг 18 ёшдан кичик ва 25 ёшдан катта бўлмаслиги, шунингдек, бўйининг баландлиги эркаклар учун 165 сантиметрдан, аёллар учун эса 160 сантиметрдан паст бўлмаслиги белгиланган.


Талабгорлардан белгиланган ҳужжатлар ҳар йили, қоида тариқасида 15 июндан 15 июлгача (шу кун ҳам) Филиал қабул комиссияси томонидан қабул қилинади.

Талабгорларни ўқишга қабул қилиш Вазирлар Маҳкамаси ҳузуридаги Давлат тест маркази томонидан ўтказилган тест синовлари натижасига кўра амалга оширилади.

Филиалда ўқитиш тўлиқ давлат грантлари асосида амалга оширилиб, бакалавриятни тамомлаган битирувчига "Юриспруденция" таълим йўналиши ва "Ҳуқуқбузарликлар профилактикаси ва жамоат хавфсизлигини таъминлаш" соҳа мутахассислиги бўйича намунадаги диплом ҳамда "Лейтенант" махсус унвони берилиб, Ички ишлар вазирлиги ёки Миллий гвардия тизимида Тошкент шаҳри ёки Тошкент вилоятида камида беш йил узлуksиз ишлаб бериш мажбурияти юкланади.

Битирувчига беш йил ишлаб бериш мажбуриятини бажариш даврида ойлик иш ҳақи тўланади ҳамда Ички ишлар вазирлиги ёки Миллий гвардия тизимида амалда мавжуд имтиёзлар тўлиқ қўлланилади.

Филиалда ўқишнинг ҳарбийлашмаган бошқа олий таълим муассасаларидан фарқли жиҳатлари қуйидаги инфографикада ўз аксини топган:



Филиал очилишидан МАҚСАД



Зарифа БОЙМУРОДОВА,
Тошкент давлат юридик университети
Ихтисослаштирилган филиали ходими:

— Филиалнинг асосий вазифалари қуйидагилар:

Аввало, юриспруденция соҳасида баъзавий ва амалий касбий тайёргарликни таъминлашга қаратилган ўқув режалари ва дастурлари асосида ҳуқуқбузарликлар профилактикаси ва жамоат хавфсизлигини таъминлаш соҳасида кадрлар тайёрлаш ва қайта тайёрлаш бўлса, назарий тайёргарликнинг ҳуқуқни қўллаш фаолияти билан узвий боғлиқлигини таъминлашга қаратилган замонавий шакл ва усуллар, ахборот-коммуникация технология-

ларини қўллаган ҳолда ўқув жараёнини таълим беришнинг модул тизими асосида ташкил этишдан иборатдир.

Бундан ташқари, филиал таълим олувчиларнинг психологик тайёргарлиги, ҳуқуқий, сиёсий маданияти ва ҳуқуқий онгини оширишнинг самарали тизимини яратиш ҳамда таълим олувчиларнинг аҳоли ва оммавий ахборот воситалари билан ишлаш ва ўзаро ҳамкорлик қилиш кўникмаларини такомиллаштиришга қаратилган кўплаб ишларни амалга оширади.

Ташкил этилган мазкур филиал Тошкент давлат юридик университетининг таркибий бўлинмаси — юридик шахс мақомига эга олий таълим муассасаси ҳисобланади.

Филиал суд ва ҳуқуқни муҳофаза қилувчи органлар ходимлари, адвокатлар, шунингдек, илмий-тадқиқот ва олий таълим муассасалари, вазирликлар, идоралар мутахассислари ва бошқа мутахассисларни ўриндошлик тартибда ёки меҳнатга соатбай ҳақ тўлаш шартларида педагогик фаолиятини амалга оширишга жалб этиш ҳуқуқига эга.


Молия вазирлиги билан келишилган ҳолда Ички ишлар вазирлиги ва Миллий гвардиянинг буюртмаларига мувофиқ ҳамда Тошкент шаҳри ва Тошкент вилоятининг ҳуқуқбузарликлар профилактикаси ва жамоат хавфсизлигини таъминлаш соҳасида юридик кадрларга бўлган эҳтиёжини инобатга олиб, филиалга қабул квоталарини кўпайтириш ёки камайитириш ҳуқуқи берилиши мумкин.

Бундан ташқари, Ички ишлар вазир-

лиги ва Миллий гвардия бюджетдан ташқари маблағлари ҳисобидан алоҳида шахсларни юридик кадрларни тайёрлаш дастурлари бўйича белгиланган квоталар (давлат грантлари)дан ташқари филиалда ўқитиш учун тўловни амалга ошириш ҳуқуқига эга.

Айни пайтда Жиззах политехника институтини негизда Жиззах вилояти ички ишлар органларининг олий нуридик маълумотга эга бўлган ходимларини қайта тайёрлаш сайёр курслари ташкил этилган бўлиб, ўқув жараёнлари давом этмоқда.

Пойтахт ҳудудининг ҳуқуқни муҳофаза қилувчи органлари учун юридик кадрларни тайёрлаш соҳасидаги илғор хорижий тажрибанинг ўрганилишини таъминлаш мақсадида Филиал директори Бахтиёр Абдуллаев бошчилигидаги делегация Беларусь Республикасига таширф буюриб, ўшбу мамлакат тажрибасини ўрганиш ҳамда Филиал билан Беларусь Республикаси Ички ишлар Академияси ўртасида ҳамкорлик меморандуми имзоланди.



СУД ҚАРОРИНИ ЎЗАЁТГАН СУДЬЯ

нима учун Конституция моддаларини қўлламаслиги керак?!

КОНСТИТУЦИЯНИНГ бевосита амал қилиши судлар фаолиятида қандай аҳамият касб этади, бу борада хорижий мамлакатлар тажрибасининг ўзига хос жиҳатлари нимада, Ўзбекистонда судлар жисмоний ва юридик шахсларнинг қонуний ҳуқуқ ҳамда манфаатлари бузилиши билан боғлиқ низоларни кўриб чиқиш ва ҳал этишда Конституцияга таянадими, нима учун суд ҳужжатларини кодекслар ва бошқа қонунлар билан асослаймизда Конституцияни қўлламаймиз?

Авааламбор, юриспруденция таълим тизимида давлат ва ҳуқуқ назариясидан сўнг фундаментал ҳуқуқ тармоқларидан бири сифатида конституциявий ҳуқуқ муҳим фан сифатида қайд этилади. Бу борада жаҳон мамлакатларининг конституцияшунослик назарияси ва амалиётига назар ташласак, Конституциянинг давлат ичида амал қилиши (қўлланилиши) юзасидан икки хил назарий ёндашув мавжудлигини кўриш мумкин. Биринчи ёндашув Конститу-

циянинг бевосита амал қилиши бўлса, иккинчи ёндашув унинг билвосита қўлланилишидир. Албатта, ҳар иккала ёндашув ҳам Конституциянинг сўзсиз устунлиги, бошқа ҳеч қандай қонун унга зид қилиши мумкин эмаслигини эътироф этади. Лекин бугун кўпга хорижий давлатлар судларининг ҳуқуқни қўллаш амалиётида Конституциянинг бевосита амал қилиши устувор аҳамият касб этиши алоҳида эътиборга молик.

Мамлакатимиз судлари амалиётига келадиган бўлсак, бу борада фақатгина Ўзбекистон Республикаси Конституциявий суди ва Олий суди Пленуми қарорларида муайян қонунни қўллашда юзга келадиган масалалар бўйича тушунтиришларида Конституцияга ҳавола қилинган нормаларни кўриш мумкин.

Хусусан, "Суд ҳокимияти тўғрисида"ги Пленум қароридида суд ҳокимияти — бу судларнинг Ўзбекистон Республикаси Конституцияси ва қонунлари устуворлиги принциплари сўзсиз риоя қилиш асосида жиноий, фуқа-

ролик, иқтисодий, маъмурий ишларини ва маъмурий ҳуқуқ-бузарлик тўғрисидаги ишларни кўриш бўйича ваколатидир, дейилган.

"Мулк ҳуқуқини тан олишга оид ишларни кўришда иқтисодий судлар томонидан қонун ҳужжатлари қўлланилишининг айрим масалалари тўғрисида"ги Пленум қароридида шундай белгиланган:

иқтисодий судлар мулк ҳуқуқини тан олиш тўғрисидаги ишларни кўришда Ўзбекистон Республикасининг Конституцияси, Ўзбекистон Республикасининг Фуқаролик кодекси, Ўзбекистон Республикаси Иқтисодий процессуал кодекси, "Ўзбекистон Республикасида мулкчилик тўғрисида"ги Ўзбекистон Республикасининг Қонуни, шунингдек, бошқа норматив-ҳуқуқий ҳужжатларга қатъий амал қилишлари лозим.

Албатта, жиноий, фуқаролик, иқтисодий ва маъмурий ҳуқуқ-бузарликлар тўғрисидаги ишларни кўришда судлар томонидан Конституциянинг устуворлиги

таъминланмоқда. Аммо судлар томонидан бундай тоифадаги ишларни кўриб чиқишда Конституцияни тўғридан-тўғри қўллаш, суд ҳал қилув қароридида Асосий қонун нормаларини бошқа қонун ҳужжатлари билан биргаликда қўллаш амалиёти етарли даражада эмас.

Масалан, фуқаролик ва иқтисодий судлар фаолиятида мол-мулкни бошқа шахснинг қонунсиз эгаллигидан талаб қилиб олиш (виндикацион даъво) ёки мулкдорнинг ҳуқуқларини эгаллик қилишдан маҳрум этиш билан боғлиқ бўлмаган ҳуқуқ-бузарликлардан ҳимоя қилиш (негатор даъво)га оид низолар кўриб чиқилади.

Мазкур низоларни кўриб чиқиш натижасида ҳақиқатан ҳам даъво талаблари асосли, деб топиш ҳолларида суд ҳал қилув қарорини Фуқаролик кодекси ва бошқа қонун ҳужжатлари билан асослантиради.

Ҳўш, нима учун биз бундай ҳолатда Конституциянинг 53 ва 54-моддаларини тўғридан-тўғри қўлламаслигимиз керак?!

Ваҳоланки, Асосий қонуни-мизнинг 53-моддасига кўра, ҳусусий мулк бошқа мулк шакллари каби дахлсиз ва давлат ҳимоясидадир, мулкдор фақат қонунда назарда тутилган ҳолларда ва тартибдагина мулкдан маҳрум этилиши мумкин, 54-моддасига мувофиқ эса мулкдор мулкига ўз хоҳишича эгаллик қилади, ундан фойдаланади ва уни тасарруф этади.

Ёки шаън ва қадр-қимматни ҳимоя қилиш бўйича низоларни кўришда ҳақорат қилинганлиги учун нафақат жавобгарлиқни назарда тутувчи Маъмурий жавобгарлик тўғрисидаги ёхуд Жиноят кодексини, балки бевосита Конституциянинг 27-моддасини қўллашимиз мумкин. Унга кўра, ҳар ким ўз шаъни ва обрўсига қилинган тажовузлардан, шахсий ҳаётига аралаштишдан ҳимояланиш ва тураржойи дахлсизлиги ҳуқуқига эга.

Албатта, бу фикр-мулоҳазалар билан биз суд қарори шундай ёзилиши керак, деган фикрдан йироқмиз. Чунки ҳар бир суд қарори судья томонидан қонунга асосланиб, ўз ички ишончи ва виждони буюрганидек мустақил чиқарилади.

Лекин суд қарори жамиятда адолат ва қонунийликни ўрнатиши билан бирга айти пайтда аҳолининг ҳуқуқий онги ва ҳуқуқий маданиятини юксалтиришдек вазифани ҳам бажаради.

Шу маънода, суд қарорини ёзган судья томонидан Конституциянинг ҳам бевосита қўлланилиши фуқароларнинг Конституцияга нисбатан ҳурматда бўлиш, дунёқарашини мустаҳкамлашга, жамиятда конституциявий-ҳуқуқий саводхонлиқни оширишга ҳам бирдек хизмат қилади.

Хусан ТУРСУНОВ,
Қарши туманлараро
иқтисодий суди судьяси,
юридик фанлар номзоди

Давлат дастуридаги энг муҳим вазифалар БУНИ БИЛАСИЗМИ?

ПРЕЗИДЕНТИМИЗНИНГ 2019 йил 17 январда "2017-2021 йилларда Ўзбекистон Республикасини ривожлантиришнинг бешта устувор йўналиши бўйича Ҳаракатлар стратегиясини "Фаол инвестициялар ва ижтимоий ривожланиш йили"да амалга оширишга оид давлат дастури тўғрисида"ги Фармони имзоланган эди.

Ушбу Давлат дастурида бир жиҳатдан асосий эътибор инновацион лойиҳалар, инвестиция лойиҳалари асосида мамлакат иқтисодиётини кескин кўтариш қаратилган бўлса, бошқа томондан аҳолининг барча ижтимоий қатламлари манфаатларини қўллаш, таълим тизimini

юксалтириш, ёшларнинг чуқур билим олиши ва янги лойиҳалар билан чиқиш учун шароит яратиш, ижтимоий ривожланиш, аҳоли ўртасида ишсизликни камайтириш, қонун устуворлигини таъминлаш масалалари энг муҳим даражага кўтарилган.

Давлат дастурига мувофиқ, 2019 йилда умумий қиймати 16,9 триллион сўм ва 8,1 миллиард АҚШ долларига тенг лойиҳа амалга оширилиши керак.

Ушбу давлат дастурида белгиланган режалар ва лойиҳаларга эътибор қаратадиган бўлсак, унда иқтисодий масалаларда баъзи оқсоқликларга чек қўйиш мақсадида принципал йўналишлар белгиланганлигини кўриш мумкин. Масалан, энди мамлакатимизда инвесторлар фаолиятига тўқсинлик қилаётган муаммоларни тезкор ва самарали ҳал этишни таъминлаш мақсадида инвесторлар билан шахсан учрашувлар ўтказиш амалиёти йўлга қўйила бошланди. Фармон билан 2019 йил 1 мартдан бош-

лаб хорижий инвестициялар иштирокидаги корхоналарнинг таъсисчилари (иштирокчилари) ва уларнинг оила аъзолари учун муддатини мамлакатдан чиқмасдан узайтириш имконияти бўлган, амал қилиш муддати уч йилни ташкил қиладиган "инвестиция визаси" жорий этилганлигини ҳам мамлакатимизга инвесторларни кўпроқ жалб этишда муҳим аҳамиятга эга. Уларга Ўзбекистон Республикасида яшаш гувоҳномаси 10 йил муддатга соддалаштирилган тартибда берилади ҳамда улар Ўзбекистон Республикаси фуқаролари учун назарда тутилган шартларда тиббий ва таълим хизматларидан фойдаланиш ҳуқуқига эгадирлар. Хорижий инвесторларга бу тариқа кенг имкониятлар яратилиши мамлакатимизда инвестиция муҳитининг янада юксалишига хизмат қилади.

2019 йилги Давлат дастури ва у билан боғлиқ Фармонда мен учун энг мақбул кўрилган яна бир жиҳатни эътиборингизга ҳавола этмоқчиман. Дастурда банд бўлмаган аҳолини, айниқса, ёшларни меҳнат бозорида талаб қори бўлган касбларга ўқитиш масаласи кўтарилган. Бунда касбий таълимнинг замонавий механизмлари жорий этилиши, ёшлар ўз малакасини ошириши учун уларга таъсирчан рағбатлантирувчи омиллар яратиш кераклиги, касб-хунар коллежлари негизда давлат-хусусий шериклик шартлари асосида банд бўлмаган аҳоли ва ишсиз фуқаролар

учун ўқитиш марказларини ташкил этиш лозимлиги хусусида вазифалар белгиланган. Ҳар бир касб ривожланиши учун, албатта, ўша касбнинг негизи мустаҳкам бўлиши керак ва билимли ёшлар уни юксалтиришга лозим. Бунинг учун 2019 йилги Давлат дастурида юқоридаги каби ҳал қилувчи асослар келтириб ўтилган. Айни пайтда босқичма-босқич равишда тегишли органлар томонидан дастурда белгиланган вазифалар амалга ошириляпти.

Ўз вақтида ушбу Фармон лойиҳаси жамоатчилик муҳокамасига қўйилган эди. Жамоатчилик муҳокамаси доирасида Давлат дастури лойиҳасига жами 4180 та таклиф келиб тушган. Маълум бўлишича, 200 дан ортиқ фуқароларнинг концептуал ва долзарб таклифларидан Давлат дастури лойиҳасини мазмунан такомиллаштиришда фойдаланилган ҳамда 30 га яқин таклифлар асосида тегишли бандларга таҳририй ўзгартришлар киритилган. Эндликда барча бандларда белгиланган вазифалар йил якунига қадар тўлиқ амалга оширилиши юртимиз тараққиёти ва фаровон ҳаётимиз учун кўпга фаолият жабжаларида адолатли ва принципа тизим ўрнатилиши учун долзарб аҳамият касб этади.

Дилдора УМАРХАНОВА,
Тошкент давлат юридик университети
"Халқаро оммавий ҳуқуқ кафедраси"
доценти, юридик фанлар доктори



ФЕЙК-НЬЮС ВА ХАВФСИЗЛИК: қонунлар ёлғонга қарши

ФЕЙК (ингл. fake) — сохта, қалбаки, деган маъноларни англатади. Ҳақиқатга жуда ўхшаб кетадиган ёлғон хабарлар, махсус дастурлар орқали ўзгартирилган фотосуратлар, монтаж қилинган видеороликлар, ижтимоий тармоқларда бошқа шахслар (одамда, машҳур инсонлар) номидан очилган “ёлғон аккаунтлар” фейкларга мисол бўла олади.

Бугун қулоғимизга “фейк”, “fake-news” иборалари тез-тез чалинмоқда. Термин сифатида улар яқин ўтмишда истеъмолга киритилган бўлса ҳам, ёлғон ахборот тарқатиш тарихи анча узоққа бориб тақалади.

Фейкларнинг авж олиши бир томондан оммавий ахборот воситаларининг профессионализмига, бошқа томондан эса ахборот истеъмолчиларининг медиа-саводхонлигига боғлиқ масалалардир.

Шу сабабали ҳам Адлия вазирлиги фейк-ньос ва медиасаводхонлик масалаларига бағишланган семинар ўтказишни режалаштирмоқда. Мақсад ёлғон, тўқима хабарларнинг, яъни уйдирмаларнинг жамият ва давлат хавфсизлигига таҳдидини очиб бериш орқали ахборот тарқатувчиларнинг масъулиятини, ахборот истеъмолчиларининг эса ҳушёрлигини оширишдан иборат.

ОАВ ВА ЁЛҒОН

Бугунги кунда жаҳон аҳолисининг катта қисми Интернет тармоқидан кенг фойдаланади. “Smart Insights” компанияси томонидан ўтказилган “Global Social Media Research Summary — 2018” тадқиқоти натижаларига кўра, ўтган йили Интернет фойдаланувчилари сони 4,021 миллиард (дунё аҳолисининг 53 фоизи) кишига етган. Бу 2017 йилга нисбатан 7 фоиз кўп, дегани.

Ижтимоий тармоқлар фойдаланувчилари сони эса 3,196 миллиард кишини (дунё аҳолисининг 42 фоизи) ташкил қилган бўлиб, бу кўрсаткич 2017 йил билан таққослаганда 13 фоизга юқоридир. Дунё аҳолиси сони 7,5 миллиарддан ортгани ҳисобга олинса, ушбу кўрсаткичлар Интернет ва ундаги ижтимоий тармоқлар фойдаланувчилари сони йилдан-йилга охирига бораётганини билдиради.

Ҳозирги кунда мамлакатимизда Интернетда фойдаланувчилар сони 20 миллионга етди. Ижтимоий тармоқларда (Facebook, Instagram, Telegram) бир кунда 1,6 миллион фойдаланувчи фаолдир.

Тадқиқотларда аён бўлмоқдаки, Интернетда, хусусан, электрон ОАВ ва ижтимоий тармоқларда ҳар куни милли-

онлаб ёлғон хабарлар тарқатилмоқда. Уларнинг оқибатлари ҳам турлича. Баъзилари ҳеч қандай аҳамиятга эга бўлмаса-да, айримлари ишонарлиги билан кишини ташвишга солиб қўяди. Шу боис дунё давлатлари ОАВда тарқатилган ёлғон хабарларга қарши курашиш, уларнинг салбий оқибатларини бартараф этиш юзасидан ўз қарашларини илгари сурмоқда.

Ахборот асрида ёлғон маълумот тарқатиши террор тактикасига тенглаштириш мумкин.

ФЕЙКЛАР ВА АХБОРОТ ИСТЕЪМОЛЧИЛАРИ

Баъзида ҳаққоний маълумот қаерда тугаб, ёлғон қаердан бошланаётганини аниқлаш қийин бўлади. Ахборотни бизнинг дунёқарашимизга мос тарзда талқин қилишди, токи биз унга ишонайлик, унга рози бўлайлик, қабул қилайлик. Шу орқали фикримизга таъсир ўтказилади ва маълум натижаларга эришилади. Тўлиқ бўлмаган ҳақиқат, ёлғон маълумот ва политехнологиялар ахборот асрининг асосий маҳсулоти бўлиб қолди. Бундан мақсад ноаниқликлар ортига ҳақиқатни яшириш, ёлғон маълумотни пардозлашдир.

Номалум томондан овоз келса, биз унинг қаердан келаётганини аниқлай олаемиз. Чунки атрофдаги шовқин бунга йўл бермайди. Фейкларни тарқатишдан мақсад ҳам айнан шу — бизни қалғитиш, ортқча шовқин кўпайтириш ва йўлимиздан адаштиришдир.

Фейкларнинг яна бир жиҳати — ўз ўзини кўпайтира олиш қобилиятидир. Яъни, мишмишлар бирдан болалади, янги-янги, аммо ёлғон тафсилотлар билан бойиб боради ва одамлар тобора кўпроқ қалғиб борадилар.

Фейкларнинг тури кўп: бир томони очикчасига зўравонлик ва геноцидга тарғиб қилиш учун ҳақиқатлардан бошланиб, нариги томони инсонларнинг қалбларидаги нозик туйғуларни уйғотиб, жамоатчилик фикрини нотўғри ўзганга бориб юборишга бориб тақалади. Бунинг жиддий оқибатлари ҳақида бир неча мисоллар келтириш мумкин.

Масалан, Руандада миллионлаб инсонларнинг ўлимига сабаб бўлган геноциднинг бошланишига радиода тарқатилган бир фейк сабаб бўлган. Ҳиндистонда эса ўтган йили WhatsApp мессенжери орқали тарқатилган ёлғон хабар туфайли 25 киши ўзбошимчилик билан суд қилиниб, аҳоли томонидан ўлдириб юборилди.

Кўриниб турганидек, оддий ҳазилми ёки жиддий кўпуровчилик мақсадида, қатъи назар, тарқатилган уйдирма алақибат миллионлаб инсонларнинг умрига зомин бўлиши, давлатларнинг ҳаёт тарзи издан чиқиши, мамлакатларнинг вайрон этилишига олиб келиши мумкин.

Ҳаммамиз англичиларга қизиқамиз. Уларга ўчмиз. Инсон руҳиятида бунга мойиллик кучли. Улар бизни таъсирлантиради, ҳаяжонга солади, биз учун зерикарли ёки аксинча қизиқарли бўлади. Фейкларга қарши курашга бел боғлаган эканмиз, аввало, ўзимиз ахборотни қандай қабул қилишимиз ва тарқатишимизни тафтиш қилиб олайлик. Чунки бугунги кунда ҳар бир ахборот истеъмолчиси айна пайтда ахборот тарқатувчиси ҳам: масалан, телеграм каналдан келган маълумотни дўстлару танишларга улашмаган одам бўлмаса керак. Шундай экан, биз қандай ахборотни истеъмол қилаемиз ва кўпайтираемиз? Бу ҳақда ҳеч ўйлаб кўрганмизми?

Фейклар туйғуларимиз, чекланган дунёқарашимиз, ахборотни саралай билмаслигимиз ва, албатта, ўзимиз ишонгимиз келган ахборотгагина ишониш оқибатида нишонга беҳато уради. Бу тактика ўзимиз ишонган ҳақиқатларни ҳар қандай баҳо эвазига бўлсин ҳимоя қилиш истагимиз туфайли юзага келган.

Ёлғон маълумот фаоллар ва етакчиларнинг обрўсини тўкиш, маълум гуруҳ одамларга нисбатан ғазаб уйғотиш ёки аксинча, ёт гуруҳларга нисбатан тоқатлиликни ҳаққонийлик, жамиятни гуруҳларга бўлиш, ниёқни кучайтириш ва ҳоказо мақсадларда тарқатилиши мумкин.

Аммо “мен ишондимми, демек шу ҳақиқат” принципида фикрлашимиз орқали ҳар қандай ёлғон маълумотни ўзимиз “ҳақиқат”га айлантирамиз. Шундай экан,

ахборотга нисбатан танқидий фикрлашимизни шакллантирмай туриб, “fake-news” билан жангга кириш бефойда эканини аниқлашимиз керак.

ФЕЙКЛАРНИ ҚАНДАЙ ФОШ ҚИЛИШ МУМКИН?

Аввало, ёлғонни фош қилишни исташимиз, атрофга реал кўз билан боқиб кетамиз. Ахборотни танқидий қабул қилсак, эшитанларимиз ёки ўқиганларимизни тафаккуримиз, билимларимиз чигиринидан ўтказиб олсак, ёлғонларнинг умрини анча қисқартирган бўламиз. Фейкларга қарши энг самарали чора — фактчекинг.

Фактчекинг — фактларни текшириш. Бунда мавжуд фактлар ва воқелик ўртасидаги номуносибликлар аниқланади, шу орқали фактларнинг рост ёки ёлғонлиги фош қилинади. Масалан, бIRON ахборотни ўқиганимизда, уни яна бошқа манбалардан текшириб олишимиз фактчекинг усулларидан биридир.

ҚОНУН ЁЛҒОНГА ҚАРШИ

Фейк материалларга қарши курашнинг давлат даражасида амалга ошириш пайти келди. Фейклар билан қонунчилик орқали курашиш — кейинги йилларда халқаро миқёсда авж олиб бораётган тенденциядир.

Fake-news масаласига нисбатан қонунчилиكنи тақомиллаштириш, журналистик ва инсоний этика меъёрларини тарғиб қилиш, ахборот тарқатиш масъулияти ва жавобгарлигини фуқароларга янада қуқурроқ аниқлаш кун тартибиде турган асосий масалалардан ҳисобланади.

Интернетда тарқалувчи ёлғон хабарларга қарши курашувчи алоҳида қонун ҳужжати мавжуд эмас. Лекин ахборот, ахборотлаштириш ва реклама соҳаларини, оммавий ахборот воситалари фаолиятини тартибга солувчи ҳамда нотўғри ахборот ёрдамида биронинг обрўсини тўкиш, тухмат қилиш, уруш ва адоват кўзгаш каби ижтимоий ҳаффи қилмишлар содир этганлик учун жазони назарда тутувчи бир қатор қонун ҳужжатлари мавжуд.

Аммо ушбу ҳуқуқий меъёрларни ахборот тарқатувчилар етарлича билмайдилар, шу сабабли қалгитувчи, ёлғон маълумотлар тарқатишда етарлича жавобгарлиكنи ҳис этмайдилар.

Адлия вазирлиги режалаштираётган тадбирдан мақсад фейкларга нисбатан ҳуқуқий чоралар қўллаш ҳамда фуқароларни масъулият ва ҳушёрликка чорлашдан иборатдир.

Шаҳноза ТЎРАҲУЖАЕВА,
Адлия вазирлиги масъул ходими

Фирибгар инспекторлар қилмиши ФОШ БЎЛДИ

ПРЕЗИДЕНТИМИЗ ўз маърузасидан бирида давлат органлари ходимларининг масъулияти хусусида тўхталиб, “Ҳар бир давлат хизматчиси ҳар куни ўзининг меҳнати билан эгаллаб турган лавозимига лойиқлигини исботлаши шарт”, деган қоидага амал қилиши зарурлигини алоҳида таъкидлаганди. Бироқ орамизда хизмат масъулиятдан ва давлат манфаатидан ўз нафсининг майлини устун қўётган ходимлар ҳамон учраётгани таассуфли ҳолат.

Бош прокуратура ҳузуридаги Мажбурий ижро бюросининг Учкўприк туман бўлими давлат инспекторлари Қосимжон Тожибоев ва Ҳасанжон Ибрагимовлар ана шу тоифадаги ходимлардан бўлиб чиқди. Ҳар иккаласи ҳам бўлимининг энергия ресурслари ва сувдан фойдаланиш тартибини назорат қилиш шўъбасида хизмат қилган. Масалан, 2017 йил 30 июндан 2018

йил 25 июлга қадар ишлаган инспектор Қосимжон Тожибоевнинг қилмишларига эътибор қаратайлик. Гап шундаки, Қосимжон 2018 йилнинг январь-март ойларида бир неча фуқароларнинг табиий газдан бўлган қарздорлигини ундиради-ю, аммо қабул қилиб олинган нақд пуллари ўз жигилдонига уради. Шу боис жиноят ишлари бўйича Учкўприк туман судининг 2018 йил 19 ноябрдаги ҳукмига биноан Жиноят кодексининг 168-моддаси, 3-қисми “б, в” бандлари (такроран ва хизмат мавқеидан фойдаланган ҳолда фуқаролар билан айбдор, деб топилиб, 2 йил муддатга моддий жавобгарлик ва мансабдорлик лавозимларида ишлаш ҳуқуқидан маҳрум қилинган ҳолда 2 йилу 6 ой муддатга ахлоқ туза-тиш ишлари жазосига маҳкум этилганди. Лекин мазкур жазо муддатини ўтаётган маҳали яна

бошқа бир қатор жабранувчиларнинг мувожаатига асосан унга иккинчи мартаба жиноят иши қўзғатилди.

Аниқланишича, Қ.Тожибоев жабранувчи А.Асқаровдан табиий газ учун 523.000 сўм пул олади.

— Қарзингизни ўзим ўқиртириб қўяман, — дейди пулни санаб олаётиб.

Бирок 2018 йил ноябрь ойида Бюронинг бошқа ходимлари келиб, аёлга 1.800.000 сўм қарзи мавжудлигини айтишди.

— Қосимжонга тўлаб келганимиз, — дея тушунтиради у ҳайрон бўлиб. Аммо ходимлар тўловни амалга оширмаса, хонадонни тармоқдан узилишини маълум қилишади. Натижада истеъмолчи аввал 800.000 сўм, кейин яна 1.000.000 сўм пул тўлайди. Шунда Қ.Тожибоевнинг А.Асқарова билан бирга жабранувчи Т.Абдурахмонов, А.Тожилиев, Х.Пўлатова, Ш.Мелихўжаева ва И.Салиева-ларнинг 1.772.000 сўм пуллари-ни фирибгарлик йўли билан қўлга кири-тиб, уларнинг абонент ҳисоб рақамига туширмасдан, жабранувчи С.Ҳасанованинг 390.000 сўм пулини эса янги электр ҳисоблагич келтириб бери-шини айтиб олиб, “ҳазм” қили-б юборгани аён бўлади.

Буни қарангки, давлат инспектори Ҳасанжон Ибрагимов ҳам фирибгарликда Қосимжондан қолишмаган экан. Агар жиноят иши материалларига назар ташланса, Х.Ибрагимовнинг муқаддам 2005 йил 1 ноябрдан 2017 йил 20 июлга қадар Учкўприк туман электр тармоқлари қорхонасида назоратчи вазифада ишлаганини, кейин эса Мажбурий ижро бюросининг юқоридеги лавозимига ишга қабул қилинганини билиш мумкин. Энг ачинарлиси, унинг фирибгарлиги ўша пайтдан бошланган экан. Яъни, Ҳасанжон Ибрагимов 2016 йилдан 2018 йил 11 декабр-гача туманининг Тошкентлигузар ва Учкўприк маҳалла фуқаролар йиғинларида яшовчи фуқаролар А.Азимов, М.Қаюмова, А.Ҳайи-

тов, Б.Масодиқов, М.Абдурахмонов, М.Исроилов, Х.Ходимуратов, М.Низомидинова, Х.Шарипова ва М.Қориевлардан жами 6.466.000 сўм пул маблағини олади. Пуллари санаб олаётганда тўловни тасдиқловчи қвтанцияларни кейинчалик олиб келиб беришга ваъда қилади. Аммо берган ваъдасини “уну-тиб”, пул маблағларини шахсий эҳтиёжларига сарфлаб юборади. Бинобарин, Х.Ибрагимовга нисбатан ҳам ҳудди Қ.Тожибоев сингари Жиноят кодексининг тегишли моддаси билан жиноят иши қўзғатилди.

Албатта, жамиятда ҳар қандай жиноятга жазо муқаррар. Шу боис жиноят ишлари бўйича Учкўприк туман суди фирибгар инспекторларнинг қилмишларига яраша қонуний жазо тайин-лади. Ўйлаймизки, энди улар-нинг қисмати бюронинг бошқа инспекторларига сабоқ бўлади.

Нодирбек МИРЗАЖОНОВ,
жиноят ишлари бўйича
Учкўприк туман суди раиси,
Хуршид СУЛТОНОВ,
“Инсон ва қонун” муҳбири

БУ ЕРЛАР КЕЧАГИ НУРОБОД ЭМАС

Чўпонлар диёрида ҳаёт қайнамоқда

БУНДАН 2-3 йил олдин асрлар давомиди қақраб ётган чўлу биёбонларда қисқа фурсатда ақлбавар қилмайдиган ободонлаштириш, бунёдкорлик ишлари амалга оширилади, деб ҳеч ким ҳаёлига келтирмаганди. Бугун умр кўй-қўзи боқиб, ўз қишлоғидан нарига ўтмаган, ҳаттоки 50-60 чақирим узоқликда бўлган туман марказига боришнинг иложини топпаган чўпон-чўлиқлар, бийдай кенг далада ғалла етиштириш билан овора бўлиб нуқул комбайнини созлайман, деб қора мойга ботиб юрган ғаллакор ўз туманида бундай ўзгаришларни кўриб ҳайратлангани рост.


Бугун одамларнинг онгу шуури, дунёқараши, ҳаётга бўлган муносабати кескин ўзгарди. Энди у кечаги авом чўпон ёки ғаллакор эмас, балки бугунги глобаллашув даврида ўзини ўнглаб олган, фикрлаши, иш юритиши ғарб бизнесменларидан қилишмайдиган ҳозирги замоннинг ҳаракатчан, фаол одами айланган. Буни яқинда ана шу туманга йўлим тушиб одамлар билан ҳамсухбат бўлганимда англадим.

Нуробод Самарқанд вилояти марказидан анча олис, майдони жиҳатидан катта бир туман. Нурободни кўрмаганимга унча кўп вақт бўлмади, лекин ана шу қисқа давр ичида бу ердаги ободончилик, бунёдкорлик борасида амалга оширилган ишлар чинданам юксак эътирофга лойиқ эканлигига амин бўлдим.


— Ҳа, ўтган давр мобайнида мисли кўрилмаган ишлар амалга оширилди, десам муболага қилмаган бўламан, — дейди биз билан суҳбатда Нуробод туман ҳокими Фахриддин Заиров. — Шуниси диққатга сазоворки, Президентимиз айнан бизнинг туманга таширф буюриб, унинг истиқбол режаларини белгилаб берган эдилар, бугун ана шу борадаги кенг қўламли ишлар олиб боришмоқда.

Тасаввур қилинг, вилоят марказидан анча узоқда бўлган, боз устига тарқок, бир-биридан олис жойлашган қишлоқларга неча йиллар раҳбарларнинг овғи етмаган. Бугун даштликларнинг бағрига офтоб тегди. Олис қишлоқларда яшаётганларнинг ҳаёти ҳам, тафаккури ҳам ўзгарди. Биринчидан, илгари мутлақо коммунал хизматидан бебаҳра бўлган дашт халқи бугун бу хизматлардан баҳраманд бўлмоқда. 20-30 йил бирор марта таъмирланмаган мактаб синф хоналари замон талабига мослашиб, чўпонларнинг болалари ёруғ хоналарда таълим олмақдалар. Энг муҳими, йиллар давомида чорва ва деҳқончиликнигина билган, шу йўсида яшаб келган дашт халқи бугун инновацион ўзгаришлар даврида замон билан ҳамоҳанг иш юритиб, дунё тадбиркорлари билан тенглаша оладиган даражада ишламоқда. Туманда ўтган давр мобайнида "OILEXTRALOV" масъулияти чекланган жамияти Сингапур-Ўзбекистон қўшма корхонаси ташкил этилиб, ушбу корхона ҳозирги кунда пластмасса маҳсулотлари ҳамда ҳар хил турдаги тиббиёт ускуналари ишлаб чиқаришмоқда. Ушбу лойиҳанинг қиймати 116,3 миллиард сўм бўлган. Бундан ташқари, ўсимликларни зарарли бактериялардан ҳимоя қилиш учун кимёвий маҳсулотлар ишлаб чиқарувчи, қиймати 26,4 миллиард сўм бўлган "Shyolkova-Agrohim Uzbekistan" Ўзбекистон-Россия қўшма корхонаси тумандан энг олис бўлган Тепакул қишлоғида иш бошлади.

Жорий йилнинг апрель ойида туманда "Maroqand Sement Invest" Хитой-Ўзбекистон қўшма корхонаси цемент ишлаб чиқаришни бошлади. Шунингдек, замон талабига мос кўрпа ва одеал ишлаб чиқарадиган "Sam Setin Textile" Корея



НУРОБОД
ТУМАНИ



Нуробод Самарқанд вилояти марказидан анча олис, майдони жиҳатидан катта бир туман. Нурободни кўрмаганимга унча кўп вақт бўлмади, лекин ана шу қисқа давр ичида бу ердаги ободончилик, бунёдкорлик борасида амалга оширилган ишлар чинданам юксак эътирофга лойиқ эканлигига амин бўлдим.

Ўзбекистон қўшма корхонаси йилнинг охиригача очиштириш режалаштирилган. Шунинг ҳам айтиш лозимки, чорвадорлар ўлкаси Нурободда ишлаб чиқарилган маҳсулотлар, хусусан, "Mirankul Conectruon Materials" масъулияти чекланган жамияти маҳсулотлари Япония, Туркия, Афғонистон, Россия, Туркменистон, Қирғизистон каби ўнлаб мамлакатларга экспорт қилинмоқда. Шу тўғрисида ҳам туманда экспорт салоҳияти йиллик режага мувофиқ 76,2 фоиз ёки 5 ойлик 296,8 фоизга бажарилди. Ўтган 2018 йил ва жорий йилнинг ўтган даврида туманда 6 та қўшма корхона очилди. Бугун уларнинг 3 таси фаолият кўрсатмоқда. Франция давлатининг "Total Eren" компаниясига фото электр

станция қуриш учун туман ҳудудидан 600 гектар ер майдони ажратиб берилди. Бугун бу ерда иш қизғин. Шунинг тан олиб айтиш керакки, Президентимиз саъй-ҳаракати ва ташаббуси билан нафақат пойтахт, вилоят марказларида, балки олис туманларда ҳам кенг қўламли ободонлаштириш, қурилиш-бунёдкорлик ишлари олиб боришмоқда. Масалан, ўтган 2 йил мобайнида тумандаги Жарқудук, Агрон, Шарқ Юлдузи маҳаллаларида қиймати 3,5 миллиард сўм бўлган замонавий мактаб биноси қуриб ишга туширилди. Нурболок, Тим, Жом маҳаллаларида қурилиш қиймати 2,5 миллиард сўм бўлган соғлиқни сақлаш иншоотлари қад ростлади. Шу пайтгача тоза ичимлик суви бўлмаган Ҳазармали, Олға, Сазаган, Тепакул қишлоқларида лойиҳа қиймати 6,7 миллиард сўм бўлган сув иншоотлари қурилмоқда. Яқин кунларда бу иншоот ишга тушиб, 22 мингдан зиёд аҳоли тоза ичимлик сувидан баҳраманд бўлади. Ўтган йили март ойининг бошида Президентимиз ташаббуси билан "Обод қишлоқ", "Обод маҳалла" дастури доирасида шариоити мутлақо талабга жавоб бер

майдиган Жом қишлоғи дастурга қиритилиб, ҳудудда мисли кўрилмаган катта ҳажмдаги бунёдкорлик ишлари амалга оширилди. Жом қишлоғига 8 километр асфальт бетон ётқизилди, 11 та янги кўприк, 42 та тунги ёритиш ускуналари, 12 та янги трансформатор, 1230 та темир бетон устунлари, 45 километр узунликда ҳаво тармоқлари таъмирланди. Шу қишлоқни тоза сув билан таъминлайдиган "Омондара" сув иншооти капитал таъмирланди. Қисқа фурсатда 75 та арзон уй-жойлар барпо этилиб, шундан 25 та кам таъминланган ва шариоити оғир бўлган оилаларга бепул уй берилди, 10 та мактаб таъмирдан чиқарилиб, уларга янги жиҳозлар берилди. Шу ҳудудда 266 та иссиқхоналар қурилиб, қўчатлар экилди.

Туманда қишлоқ хўжалиги соҳасида ҳам туб бурилиш ясалди. Бу соҳани ривожлантиришнинг манзилли дастури асосида жами 6 миллиард 935 миллион сўмлик 11 та лойиҳа режалаштирилган. Хусусан, қоракўлчилик йўналишида умумий қиймати 2 миллиард 850 миллион сўмлик лойиҳа ишга туширилди. "Моҳинур Нуробод юлдузлари" фермер хўжалиги томонидан умумий қиймати 1 миллиард 300 миллион сўмлик 89 бош насли қорамол Австралиядан олиб келинди. "Quality Dairy Forum" МЧЖ умумий қиймати 750 миллион сўм бўлган 100 та насли қорамолни Германиядан олиб келди. Қўйчилик йўналишида умумий қиймати 2 миллиард 75 миллион сўмлик 4 та лойиҳа асосида 20 минг 900 бош ҳисор қўйлари Қозғистон давлатидан олиб келиниб, парвариш қилинмоқда. Жорий 2019 йилда насли қорамолларни турли манзиллардан олиб келиб, ундан маҳсулот олиш учун умумий қиймати 17 миллиард 420 миллион сўмлик лойиҳа режалаштирилган. 2019-2020 йилларда туманда саноатда 3 триллиондан ошми, қишлоқ хўжалигида

946,70 миллион сўмлик, хизмат кўрсатиш соҳасида 9819 миллион сўмлик инвестиция лойиҳаси ишга туширилади. Жорий 2019 йил туман марказидан анча олис бўлган Наврўз, Улус ва Халқобод қишлоқларида "Обод қишлоқ" дастури бўйича қуйидаги ишлар режалаштирилган. Хусусан, Наврўз қишлоғида 1,1 км. асфальт, 4,4 км. қум-шағал аралашмаси тўқилиб, ички йўллар ётқизилди. Улусда 2,5 км, Халқободда эса 4,5 км. йўллар таъмирланмоқда. Шу қишлоқларда 6 та янги сув иншоотлари, 16 км. янги сув тармоғи, 9 та трансформатор, 1 та янги мактаб, 45 та сўғориш қудуқлари ва 3 та тикухона қурилиши режалаштирилмоқда.

Туманда 600 гектар ерга ғалла, 553 гектарга сабзавот, 2371 гектар ерга озуқа экинлари экиш режалаштирилган.

— Мислсиз ўзгаришларни кўриб ҳайратда қолдим, — дейди Сепки қишлоғида яшовчи Эркин бобо Ишатов. — Умрим дашт ва тоғ оралиғида қўй боқиш билан ўтди. Юртбошимизга минг раҳмат. Биз даштликларни бағрига ҳам шамол тегди, электр энергияси, газ бўлмай роса қийналардик. Худога шукр, ҳаммаси яхши. Тунов куни туман марказида яшайдиган келиним келиб, ўғлингиз қўшма корхона тузиб, қўшма корхонада ишлаб, Сингапур, деган давлатга кетди, деб айтиб қолди. Сингапур қаерда бўлса ҳам, тинчлик-омонлик бўлсин.

— Қарийб 40 йил раҳбарлик лавозимида ишлаганман, — дейди туман Нуронийлар жағғармаси раиси Абдурахмон Шарипов. — Туманимизда бу даражада қисқа фурсатда ўзгариш бўлиши етти ухлаб тушимга ҳам кирмаганди, бугун ким билан суҳбатлашманг, эртанги нурли кунини ўйлаб ҳаракат қилмоқда. Мени қувонтирадиган бир нарса бугун одамларимиз кечаги одам эмас, уларнинг дунёқараши ўзгарган. Шундай экан Ўзбекистонимизнинг келажаги порлоқ бўлишига аминман.

Ҳа, бугун чўпонлар диёри Нурободда ҳаёт қайнади, бу юрт одамлари замондан орқада қолмаслик учун дадил ҳаракат қилмоқдалар. Чунки улар яхши ҳаёт кечиришга ҳақлидирлар.

Азиз ҚОДИРОВ,
"Инсон ва қонун" мухбири

Хизматлар лицензияланган.

“Паспортим 2 ОЙ ЎЗИМДА 1 ОЙ ДАВЛАТ ИДОРЛАРИДА турар эди”



ҲАР бир ота-она ўз фарзандининг бахту қамоллини кўришни истайди. Афсуски, бу орзу-ният йўлида қонунни четлаб ўтиш ҳолатлари ҳам учрамоқда. Бир неча йиллар давомида ноқонуний тураржойларни бунёд этиб, ҳадиқ ва хавотирда яшаётган ҳамюртларимиз учун давлатимиз раҳбари томонидан илгари сурилган ўзбошимчилик билан қурилган тураржойларга нисбатан бир марталик умумдавлат акциясининг эълон қилиниши қутилмаган омад бўлди. Андижон шаҳри, “Андижон” МФЙ, Храбек кўчаси, 148-уйда истиқомат қилувчи Ф.Назаров узоқ йиллар давомида ечим топа олмаётган муаммосининг ўзи ва оиласи учун бирдек манфаатли ҳал этилганидан хурсанд. Чунки у ўзлаштириб олган ер майдонида ноқонуний равишда уй-жой қуриб, унга анча-мунча маблағ сарфлаб қўйган эди. Аини акция сабаб мулкка эгаллик қилиш ҳуқуқини қўлга киритди. Худди шу каби давлат хиз-

матлари марказлари томонидан уйма-уй юриб амалга оширилган тушунтириш ишлари натижасида биргина Андижон вилоятининг ўзида мулк ҳуқуқини эътироф этиш бўйича 15 513 та мурожаат ижобий ҳал этилди.

Умуман олганда, Агентликнинг ташкил этилиши давлат хизматлари соҳасида янги даврни бошлаб берди. Ортиқча оворагарчиликсиз, содда, тезкор, қулай, шаффоф хизматдан қўнчилик мамнун бўлаётди. Қолаверса, бугун бу соҳага ҳам инновация кирди, ҳамюртларимиз орақиб кутган замонавий, яхлит тизим йўлга қўйилди. Буни вилоятда фаолият кўрсатаётган хорижий инвесторлар ҳам алоҳида эътироф этмоқда.

— Инвестиция қиритиш учун, энг аввало, тинчлик ҳукм сураётган мамлакат танланади. Ўзбекистонда тинчлик бор. Иккинчидан, давлат ташкилотлари томонидан сифатли хизмат кўрсатилишига эътибор қаратилади, — дейди

Шахрихон туманида жойлашган “Cotton grant textile” таъсисчиси хитойлик Рен Ланг Чанг. — Мен Ўзбекистонга келганимга 4 йил бўлди. Дастлаб келганимда қозғозбозлик, ортиқча оворагарчиликлар кўп эди. Кимдир ёнингизда йўл кўрсатмаса анчайин қийналадиган ҳолат. Кейинги икки йил ичида юртингизда жуда катта ўзгаришлар юз бермоқда. Инвесторларга қатор қулайликлар яратилапти. Давлат хизматлари марказининг ёрдами билан тегишли ҳужжатни олиш, у ёки бу муаммони шу ернинг ўзида қисқа муддат ичида сифатли ҳал этилишига эришаёман.

Шунингдек, Олтинқўл туманида ўз бизнесини йўлга қўя олган туркиялик тадбиркор Суружу Серхат ҳам қўйидаги фикрларни баён этди.

— Давлат томонидан инвесторларга жуда катта имкониятлар берилапти. Эътиборли жиҳати, ишлаб қиариш жараёни билан боғлиқ механизм такомиллашиб бораёпти. Тўғриси айтсам, дастлаб Ўзбекистонга келганимда виза, лицензия каби масалалар сабаб фуқаролик паспортим икки ой ўзимда бўлар, бир ой давлат идораларида турар эди. Ҳозир ундай эмас. Вақти келса пойтахтга ҳам бормаямиз. Катта-кичик масалаларимизга Олтинқўл туман Давлат хизматлари маркази томонидан ижобий ечим топилапти. Албатта, кўрсатилаётган қулай, тезкор хизматлар бизни мамнун этмоқда.

Мансурбек БОБАХОНОВ,
Давлат хизматлари Агентлиги
Андижон вилоят бошқармаси
бош маслаҳатчиси

Мурожаатчилар сони 50 БАРОБАРГА ОШДИ



МАМЛАКАТИМИЗДА маъмурий ислохотлар режасини изчил амалга ошириш, аҳолининг ҳаёт даражасини юксалтириш ва ишбилармонлик муҳитини яхшилаш, бизнесни ривожлантириш мақсадида давлат хизматлари кўрсатишининг миллий тизими ўз доирасини кенгайтирмоқда. Қисқа давра оралиғида “Ягона дарча” тамойили бўйича халқимизга кўрсатилаётган давлат хизматлари сони ортиб, ушбу хизматлардан фойдаланиш мақсадида мурожаат қилаётган фуқаролар сони 50 баробарга ошди. Шунингдек, қўшимча давлат хизматларининг жорий этилиши билан мазкур сон кўрсаткичлари икки баробарга ортиши кутилмоқда.

Хусусан, фуқароларга қулайлик яратиш мақсадида давлат хизматлари олиш учун Ўзбекистон Республикаси Ягона интерактив давлат хизматлари портали орқали мурожаат этганда давлат божи, йиғимлар ва бошқа тўловлар аини реал шaroитда Марказлар орқали ёки хизмат кўрсатувчи органларга мурожаат этганда тўланадиган сумманинг 10 фоизи миқдориди камроқ тўланиши белгилан қўйилди.

Андижон шаҳар Давлат хизматлари маркази жорий йилнинг 1 июнидан бошлаб жисмоний ва юридик шахсларга экстерриториал тамойил бўйича хизмат кўрсатишни йўлга қўйди. Бу тизимнинг жорий этилиши билан фуқаролар доимий ёки вақтинча рўйхатдан ўтган ва бевосита почта манзили жойидан қатъи назар, исталган ҳудуддаги давлат хизматлари марказларига мурожаат қилиш имкониятига эга бўлдилар.

Гуллола ҚУРБАНОВА,
Андижон шаҳар
Давлат хизматлари маркази ходими

ЭЪЛОНЛАР

Чилонзор педагогика коллежи томонидан Умиджонов Робия Қобилжон кизига 2018 йилда берилган К №5316069 рақамли диплом йўқолганлиги сабабли бекор қилинади.

Сергели туман Давлат хизматлари маркази томонидан (Сергели тумани, Обихаёт кўчаси, 3а-уй) 2019 йил 19 февралда 689432-сонли реестр рақами билан давлат рўйхатига олинган “AS-SABUR SNOX” NTM манзили Қўйил 5 маззеси, Шерматов кўчаси, 252-уй (СТПР 306 159 176) таъсисчисининг 2019 йил 12 июндаги 1-сонли қарорига асосан тугатилди.

Давлолар эълон чоп этилган кундан бошлаб 2 ой мобайнида қорхона почта манзили бўйича қабул қилинади.
Тел.: (94) 623-68-80.

Сергели туман Давлат хизматлари маркази томонидан (Сергели тумани, Обихаёт кўчаси, 3а-уй) 2018 йил 21 декабрда 658196-сонли реестр рақами билан давлат рўйхатига олинган “NEUTRINO” NTM манзили Сергели тумани, Сергели кўчаси, 55-уй (СТПР 305 916 595) таъсисчисининг 2019 йил 13 июндаги 1-сонли қарорига асосан тугатилди.

Давлолар эълон чоп этилган кундан бошлаб 2 ой мобайнида қорхона почта манзили бўйича қабул қилинади.
Тел.: (99) 820-31-53.

Тошкент шаҳар, Чилонзор тумани тадбиркорлик субъектларини рўйхатдан ўтказиш инспекцияси томонидан 03.10.2018 йилда 1298487 рўйхат рақами билан Тошкент шаҳар, Чилонзор тумани 7, Мўйиний манзилида давлат рўйхатдан ўтган “DV CARPET” МҲК (СТПР 305 782 804) таъсисчисининг 2019 йил 12 июндаги қарорига асосан тугатилди.

Давлолар эълон чоп этилган кундан бошлаб 1 ой мобайнида қабул қилинади.
Тел.: (94) 945-41-31.

Сергели туман Давлат хизматлари маркази томонидан (Сергели тумани, Обихаёт кўчаси, 3а-уй) 2019 йил 3 июнда 730174-сонли реестр рақами билан давлат рўйхатига олинган “SAYHUN SITY” МҲК манзили Тошкент шаҳар, Чилонзор тумани, 19-дах, 15-уй, 6-хонадон (СТПР 306 476 899) таъсисчисининг 2019 йил 12 июндаги 1-сонли қарорига асосан тугатилди.

Давлолар эълон чоп этилган кундан бошлаб 2 ой мобайнида қорхона почта манзили бўйича қабул

қилинади.
Тел.: (91) 191-28-82.

Тошкент давлат Иқтисодиёт университети қришда Чилонзор академик лицейи томонидан Абдуллаев Елзод Ериновичига 2014 йилда берилган L №204439 рақамли диплом йўқолганлиги сабабли бекор қилинади.

Ўзбекистон Республикаси Адлия вазирлиги томонидан ушбу вазирлиқнинг Жиноий, маъмурий ва иқтисодий қўнчилик бошқармаси 1-тоғали иш қўрувчи котиби Исомов Камолуддин Зайниддин ўғлига берилган №0167 рақамли рухсатнома йўқолганлиги сабабли бекор қилинади.

Тошкент давлат Аграр университети томонидан 1979 йил 27 сентябрда туғилган Назиров Музаффар Туляганович номига 2001 йилда берилган В №621600 рақамли диплом (қайд қилиш рақами: 785) йўқолганлиги сабабли бекор қилинади.

Яккасарой туман “Ягона дарча” марказида 10.05.2017 йилда 515923 реестр рақами билан давлат рўйхатдан ўтган “HAMIDAXON MAX BIZNESS” МҲК (манзили: Яккасарой тумани, А.Қаҳҳор кўчаси, 12-уй) таъсисчисининг 2019 йил 1 июндаги қарорига асосан тугатилди.

(СТПР: 304 880 952).
Давлолар эълон чоп этилган кундан бошлаб 2 ой мобайнида қорхона почта манзили бўйича қабул қилинади.

Тел.: (71) 215-81-96.

Сергели туман Давлат хизматлари маркази томонидан (Сергели тумани, Обихаёт кўчаси, 3а-уй) 2018 йил 29 январда 570224-сонли реестр рақами билан давлат рўйхатига олинган “USMON STROY” МҲК манзили Сергели тумани, Сергели-8А-16-2 (СТПР 305 254 993) таъсисчисининг 2019 йил 12 июндаги 1-сонли қарорига асосан тугатилди.

Давлолар эълон чоп этилган кундан бошлаб 2 ой мобайнида қорхона почта манзили бўйича қабул қилинади.
Тел.: (99) 301-00-03.

Тошкент шаҳар, Учтепа туман Давлат хизматлари марказида 05.09.2018 йилда 632848-сонли рўйхат рақами билан Тошкент шаҳар, Учтепа тумани, Изза кўчаси, 102-уй, 2-хонадон манзилида давлат рўйхатдан ўтган “SHUNRAT EXPRESS” МҲК (СТПР 305 726 001) таъсисчиларининг 2019 йил 11 июндаги

қарорига асосан тугатилди.

Давлолар эълон чоп этилган кундан бошлаб 2 ой мобайнида қабул қилинади.
Тел.: (94) 603-11-71.

Тошкент шаҳар, Учтепа туман Давлат хизматлари марказида 28.11.2018 йилда 653044-сонли рўйхат рақами билан Тошкент шаҳар, Учтепа туман, 12-мавзе, 11-уй, 23-хонадон манзилида давлат рўйхатдан ўтган “KELAJAK TARAQIYOTI YOSHILARI BEHZOD” МҲК (СТПР 305 877 653) таъсисчиларининг 2019 йил 10 июндаги қарорига асосан тугатилди.

Давлолар эълон чоп этилган кундан бошлаб 1 ой мобайнида қабул қилинади.
Тел.: (99) 838-82-02.

Юнусобод туман Давлат хизматлари маркази томонидан 13.11.2018 йилда №649614 реестр тартиб рақами билан рўйхатдан ўтган “BALTIC GOODS” масъулияти чекланган жамиятининг бурчак штапми йўқолганлиги сабабли бекор қилинади.

Давлолар (93) 181-60-60 телефон рақами орқали қабул қилинади.
ИНН: 305 852 749.

Юнусобод туман Давлат хизматлари маркази томонидан 11.04.2008 йилда №3686-10 реестр тартиб рақами билан рўйхатдан ўтган “ENERGO TEHNIIKA GARANT” масъулияти чекланган жамияти тугатилди.

Давлолар (93) 568-85-75 телефон рақами орқали қабул қилинади.

ИНН: 206 957 570.

Юнусобод туман Давлат хизматлари маркази томонидан 16.03.2017 йилда №011871-10 реестр тартиб рақами билан рўйхатдан ўтган “KOPILKA ZHANIY” нодавлат таълим муассасаси 04.06.2019 йилдаги №01-сонли қарорига асосан тугатилди.

Давлолар (93) 420-45-42 телефон рақами орқали қабул қилинади.

ИНН: 304 745 343.

Тошкент шаҳар, Чилонзор туман тадбиркорлик субъектларини рўйхатдан ўтказиш инспекциясида 13.03.2017 йилда 013015-08 рўйхат рақами билан Тошкент шаҳар, Чилонзор тумани, Вунодкор шох кўчаси, 41-уй манзилида давлат рўйхатдан ўтган “QUADRO GROUP” МҲК (СТПР 304 733 707) таъсисчисининг 2019 йил 30 майдаги қарорига асосан тугатилди.

Давлолар эълон чоп этилган кундан бошлаб 1 ой мобайнида қабул қилинади.
Тел.: (94) 649-49-88.

Мирзо Улугбек туман Давлат хизматлари маркази томонидан 06.03.2018 йилда 587133-сонли реестр тартиб рақами билан рўйхатдан ўтган Мирзо Улугбек тумани, Буюк Илак йўли кўчаси, 232-234-уй манзилида жойлашган “MEDIA SALES” масъулияти чекланган жамият таъсисчиларининг 2019 йил 10 июндаги 1-сонли Баённомага асосан тугатилди.

Давлолар (90) 176-13-24 телефон рақами орқали қабул қилинади.
СТПР: 305 385 467.

Мирзо Улугбек туман Давлат хизматлари маркази томонидан 14.05.2019 йилда 722395-сонли реестр тартиб рақами билан рўйхатдан ўтган Мирзо Улугбек тумани, Бўра-2 маззеси, 25-уй манзилида жойлашган “SHAKIROVA RANO BIZNES” хусусий қорхона таъсисчисининг 2019 йил 10 июндаги 1-сонли қарорига асосан тугатилди.

Давлолар (97) 760-00-24 телефон рақами орқали қабул қилинади.
СТПР: 306 416 860.

Мирзо Улугбек туман Давлат хизматлари маркази томонидан 18.07.2018 йилда 623117-сонли реестр тартиб рақами билан рўйхатдан ўтган Мирзо Улугбек тумани, Чотқол кўчаси, 2-уй манзилида жойлашган “USUR TECHNICAL TEXTILE AND INVESTMENTS” масъулияти чекланган жамият таъсисчисининг 2019 йил 12 июндаги қарорига асосан тугатилди.

Давлолар (99) 009-68-35 телефон рақами орқали қабул қилинади.

СТПР: 305 658 015.

Сергели туманидаги “CONFIDENCE LIGA” масъулияти чекланган жамиятта тегишли думалоқ муҳр йўқолганлиги сабабли бекор қилинади.

Сурхондарё вилоят адлия бошқармаси жамоаси бошқарманинг кадрлар бўлими бош маслаҳатчиси Санжарбек Акрамовга отаси **Анвар АКРАМОВ**нинг вафот этганлиги муносабати билан чуқур таъзия изҳор этади.

“СОВУҚ ҚУРОЛ” ларни рухсатсиз олиб юриш мумкинми?

ҚУРОЛ, ўқ-дорилар, портловчи моддалар ёки портлатиш қурилмаларига қонунга хилоф равишда эғалик қилиш жамият аъзоларининг соғлом ҳаёт тарзини издан чиқаради.

Хавф шундан иборатки, ушбу предметлар турли жиноятларни содир қилишда фойдаланилиши мумкин. Уларни рухсатсиз олиб юриш, сақлаш, тайёрлаш ва сотиш, мазкур предметлардан тўғри фойдаланимаслик ёки улар билан эҳтиётсизлик билан муомалада бўлиш натижасида бахтсиз ҳодиса юз бериши, фуқаролар ҳаёти ва соғлиғига, шунингдек, давлат ва шахсий мулкка зарар етказилиши мумкин. Айниқса, глобаллашув шароитларида қурол ва ўқ-дориларнинг республикага ташқаридан келтирилиши, уларнинг омборхоналардан талон-торож этилиши, қуролга эғалик қилиш мақсадида ҳокимият вакиллари ва ҳарбий хизматчиларга ҳужум қилиниши ҳоллари ортади.

Шу сабабдан, бундай қилмиш учун Жиноят кодексининг 248-моддасида жиноий жавобгарлик назарда тутилган. Шунингдек, 2009 йил 14 сентябрда “Шанхай

ҳамкорлик ташкилотига аъзо давлатлар ҳукуматлари ўртасида қуроллар, ўқ-дорилар ва портловчи моддаларнинг ноқонуний айланишига қарши курашда ҳамкорлик тўғрисидаги Битимни (Душанбе, 2008 йил 28 август) ратификация қилиш ҳақида”ги Қонун қабул қилинган.

Таъкидлаш лозимки, бундай предметлар билан муомалада бўлишнинг алоҳида тартиби белгиланган қатор қонун ва қонуности ҳужжатлари қабул қилинган. Жумладан, ўрнатилган қоидаларга мувофиқ ўқотар қурол, шунингдек, ўқ-дорилар, портловчи моддалар ёки портлатиш қурилмалари тайёрлаш, олиш, олиб юриш, сақлаш, олиб ўтиш, жўнатиш ёки ўтказиш тегишли рухсатнома асосида амалга оширилади.

Бунда:

а) ўқ-дорилар, портловчи моддалар ёки портлатиш қурилмалари тайёрлаш,

олиш, олиб юриш, сақлаш, олиб ўтиш, жўнатиш ёки ўтказиш тегишли рухсатномасиз амалга оширилган тақдирда, айбдор шахс Жиноят кодексининг 248-моддасига мувофиқ жиноий жавобгарликка тортилади;

б) қуролни сақлашга ички ишлар органлари томонидан берилган рухсатномага эга бўла туриб, ўқотар қуроллар ва ўқ-дориларни сақлаш ёки ташиш қоидаларини бузиш, шунингдек, корхоналар, муассасалар ва ташкилотларнинг ўқотар қуроллар ва ўқ-дориларни сақлаш учун масъул бўлган ходимлар томонидан уларни сақлаш ёки ташиш қоидаларини бузиш, ҳудди шунингдек, мазкур ходимлар томонидан ўқотар қуроллар ва ўқ-дорилардан бошқа мақсадларда фойдаланиш Маъмурий жавобгарлик тўғрисидаги кодекснинг 220-моддасига мувофиқ;

в) ўқотар қуролларни рўйхатдан ўтказиш (қайта рўйхатдан ўтказиш) юзасидан белгиланган муддатларни ёки истиқомат жойи ўзгарган тақдирда бундай қуролларни ички ишлар органларида ҳисобдан ўтказдириб қўйиш қоидаларини бузиш Маъмурий жавобгарлик тўғрисидаги кодекснинг 221-моддасига мувофиқ маъмурий жавобгарликка сабаб бўлади.

Бироқ бизда амалиётда “совуқ қурол” предмети аниқлик киритишда муаммолар юзага келади. Ўзбекистон Республикаси Олий суди Пленумининг 2002 йил 14 июндаги “Безориликка оид ишлар бўйича суд амалиёти тўғрисида”ги қарорига кўра, совуқ қурол деганда, ўз моҳиятига

кўра инсоннинг ҳаёти ва соғлиғига қарши ишлатиш учун мўлжалланган, суд-криминалистик экспертизаси хулосасига мувофиқ совуқ қурол, деб топилган нарсалар тушунилади. Таъкидлаш лозимки, ривожланган давлатларда совуқ қуролни рухсатномасиз ишлаб чиқариш, олиб юриш, ўтказиш, таъмирлаш қилмишлари учун жавобгарлик белгиланган. Мамлакатимиз жиноят қонунчилигида қурол, ўқ-дорилар, портловчи моддалар ёки портлатиш қурилмаларига қонунга хилоф равишда эғалик қилиш учун жавобгарлик белгиланган бўлса-да, Жиноят кодексининг 248-моддаси диспозициясида совуқ қурол жиноят предмети сифатида назарда тутилмаган. Бизнингча, бугунги кунда совуқ қурол орқали содир этилаётган қилмишлар ортиб бораётганлиги, ушбу қилмишнинг ижтимоий хавфи юқори эканлигини инобатга олиб, совуқ қуролга қонунга хилоф равишда эғалик қилиш учун жиноий жавобгарлик масаласини кўриб чиқиш мақсадга мувофиқ.

Шунингдек, ўқотар қуролнинг қисмларини тайёрлаш, олиш, олиб юриш, сақлаш, олиб ўтиш ёки жўнатиш, шунингдек, ўқотар қуролга ўзгартириш киритиш ёки таъмирлаш учун ҳам жавобгарлик масаласига аниқлик киритиш, бу борада жиноят қонунчилигини такомиллаштиришни таклиф этамиз.

Асқаржон НАБИЕВ,
Ички ишлар вазирлиги
академияси тингловчиси

РЕКЛАМА

Ҳурматли тадбиркорлар!

“АСАКА” БАНК

**бизнесингизни молиялаштириш ва ривожлантириш
учун қуйидаги хорижий банкларнинг
кредит линиялари маблағлари ҳисобидан кредитлар
таклиф этади:**

- Коммерцбанк А.Г. (Германия);
- КФВ Ипекс Банк (Германия);
- Ландесбанк А.Г. (Германия);
- Хитой Халқ Республикаси Давлат Тараққиёт Банки;
- Корея Республикаси Эксимбанки;

- Халқаро Тикланиш ва Тараққиёт Банки — “Ўзбекистон Республикасида боғдорчилик секторини ривожлантириш” лойиҳаси доирасида;
- Туркия Республикаси Эксимбанки;
- Халқаро Тараққиёт Агентлиги — “Ўзбекистон Республикасида чорвачилик соҳасини ривожлантириш” лойиҳаси доирасида.

**“АСАКА” БАНК — тадбиркорлик
тараққиётининг мустаҳкам таянчи!**

Маълумот учун телефонлар: (78) 120-82-01, 120-82-09, 120-82-24,
120-82-62, 120-82-96, 120-86-83.



www.asakabank.uz

Хизматлар лицензияланган.

ИНСОН ҚОНУН

МУАССИС:
ЎЗБЕКИСТОН РЕСПУБЛИКАСИ
АДИЯ ВАЗИРЛИГИ
www.minjust.uz

2007 йил 3 январда
Ўзбекистон
Матбуот ва ахборот
агентлигида
0081-рақам билан
рўйхатга олинган



**Бош
муҳаррир**

**Қўчор
НОРҚОБИЛ**

ТАХРИР ҲАЙЪАТИ:

Тошқулов Ахбар Жўрабович
Рабиёв Шерзод Миржалилович
Тожиёв Фуқрат Шомуродович
Искандаров Ербек Нурбекович
Эргашева Дилфуза Рустамонова
Мамадалиёв Зайниддин Очилов

Тахририятга келган
қўлёзмалар тақриз
қилинмайди ва муаллифга
қайтарилмайди.

Навбатчи
Ербек Искандаров

**Саҳифаловчи-
дизайнер**
Жасур Тожибоев

Нашр индекси: 137

“ИНСОН ВА ҚОНУН” газетаси тахририяти компьютер базасида терилди ва саҳифаланди. А-3 бичимда, 2 босма табоқ ҳажмда, офсет усулида “Ўзбекистон” нашриёт матбаа ижодий уйида чоп этилди.

Корхона манзили: Тошкент шаҳри, Навоий кўчаси, 30-уй.
Ушбу сонда ЎЗА суратларидан фойдаланилди.

Тиражи — 11603
Буюртма — V-3512
Тошпириш вақти — 19:00
Тошпирилди — 21:30

МАНЗИЛИМИЗ:

100 000, Тошкент ш.

Сайилгоҳ кўчаси-35.

Факс: (0371) 233-44-23,

(0371) 233-44-08

Обуна бўлими: 233-44-09

Баҳоли қилинган нархда

1 2 3 4 5